

Eksport kayu balak tahun lalu diunjur lebih RM23 bilion



➔ Permintaan global stabil pacu permintaan

Oleh Ooi Tee Ching
bhbiz@bh.com.my

Eksport kayu balak negara bagi 2017 berkemungkinan melebihi RM23 bilion berikutan permintaan global yang semakin stabil.

“Dalam tempoh 11 bulan pertama tahun lalu, kita mencatat sejumlah RM21.40 bilion dalam eksport kayu, dengan sebahagian besar disumbangkan oleh jualan

perabot kayu,” kata Menteri Perusahaan Perladangan dan Komoditi, Datuk Seri Mah Siew Keong.

“Eksport kayu akan melebihi RM23 bilion bagi 2017,” katanya kepada pemberita pada majlis makan malam Lembaga Kayu Malaysia (MTC), baru-baru ini.

Pada masa ini, hasil kayu negara dieksport ke lebih 162 buah negara dengan India menjadi pasaran utama.

Malaysia antara 10 pengeluar utama

“Dalam usaha untuk meneroka lebih banyak peluang dagangan dengan India, MTC membuka pejabat wilayahnya di Bangalore baru-baru ini,” katanya.

Malaysia adalah satu daripada pengeluar kayu tropika utama di

dunia, yang mana sektor perabot menjadi industri bernilai apabila berada dalam kalangan 10 pengeluar utama di dunia.

“Industri kayu masih berpotensi dan mapan,” katanya sambil menambah 80 peratus daripada perabot yang dieksport diperbuat daripada pokok getah.

Sektor kayu di negara ini adalah pelabur terbesar dalam penanaman pokok. Sejak 2005, kerajaan sudah melaksanakan Program Pembangunan Penanaman Hutan bagi memastikan bekalan kayu yang mencukupi bagi perniagaan hiliran seperti pembuatan perabot.

Sasaran Malaysia adalah untuk mempunyai 375,000 hektar penanaman hutan menjelang 2020. Ia boleh dicapai dengan

menanam 25,000 hektar spesies kayu yang baik setahun bagi tempoh 15 tahun, bermula dari 2005.

RM3 juta insentif untuk PKS

Siew Keong berkata, kementeriannya juga sedang memformulasikan Pelan Pembangunan Batang Pokok Kelapa Sawit bagi menggalakkan pembuat perabot mempertimbangkan ia sebagai satu lagi pilihan bahan mentah.

MTC memperuntukkan RM3 juta sebagai insentif bagi perusahaan kecil sederhana (PKS) untuk membeli mesin kerja kayu.

“Saya menggalakkan PKS untuk mengambil manfaat daripada inisiatif ini bagi mempelajari teknologi terbaru dalam automasi dan mekanisasi,” katanya.

Dalam tempoh 11 bulan pertama tahun lalu, kita mencatat sejumlah RM21.40 bilion dalam eksport kayu, dengan sebahagian besar disumbangkan oleh jualan perabot kayu”

Mah Siew Keong,
Menteri Perusahaan
Perladangan dan Komoditi